

Payí Poro Piripai ηweáyí nání eañinarini.

Payí rina Jisasoyá siyikí imónigíá aņí yóí Piripai ηweagíáyí nání Poro eañinarini. Aņí aņi Masedonia piropenisíyo xwé birini. Poro émáyí aņí tńjímíni xwiyíá yayí winipaxí imóniņipi wái nura nemeríná aņí apimi eni wái uriméagi áamá wí Jisasomi diņí wikwírogíawixini (Wái wurimeiarigíáwa 16:12-40). E nemo xwiogwí obaxí rixa nimúrómáná eņáná ámi wí e emearíná omi íá nixero gwí aņıyo niņwirářirow awí nimeηweagíasáná aņí yóí Romiyo nání niméra nuro e gwí aņıyo ηwiráraná Piripai ηweáyí aríá niwiro nigwí bi Poro nání awí nearo Epariroaditasomi wiowáragía o xamiņo yayí neri payí rina e dání neari axomi wiowářiņinigini.

1 ¹ Poroni tńni Timotio tńni —Yawawi xwiyíá Kiraisoyá wái wurimeianirai nání xináipawíniņi nimónirai wiariğwífwawirini. Yawawi áamá Piripai ηweagíá Gorixoyá imóniro Kiraisi Jisaso tńni ikáriniro egiáyíne niyíneni nání —segí seaipeηweagíáwa tńni seáyí seaiarigíáwa tńni aí niyíneni nání payí rina neari mónapariņwii. ² “Negí ápo Gorixo tńni Áminá Jisasi Kiraiso tńni wá seawianiri seyíne niwayiróniro ηweapíri nání seaiiri éiisixini.” nimónarini.

“Seyíne nání Gorixomi yayí wiariņarini.” uriņi nánirini.

³ Íníná seyíne nání diņi nináná Gorixomi yayí wiariņarini. ⁴⁻⁵ Nioni síá seyíne Gorixomi diņi wikwírogíáyimi dání agwi ríná nání xwiyíá Jisaso nání wái wurimeiani nání nawíni ikárininwáyíne eņagi nání omi gíni gíná rixiņi niseauriyiríná diņi nińáni ninariņagi urariņarini. ⁶ Nioni diņi re yaiwariņarini, “Gorixo —O seyíne xíomi diņi wikwíróáná iwamíó píraninđi seaimixiņorini. O síá Jisaso weapiniáyí nání seyíne yóí ámi bi tńni bi tńni nimóga upíría nání píraninđi niseaimixa uníarini.” Diņi e niyaiwiri nání diņi síńá niseaeániri omi yayí e wiariņarini. ⁷ Ayí ripi nání seyíne nání yayí nininiríná “Ayí xixeni ayo ninariņarini.” nimónarini. Nioni xwiyíá Jisaso yayí neainariņipi nání gwí aņi tıyo niņwearínarani, xwiyíá nimeararigíápi orakíniminiri nirińarani, aņi sopiņi oominiri nirińarani, seyíne Gorixo wá niníwianiri e éwiniğiniri

nirípeaŋoni tñni nawíni ikárininagía náni nioni diŋí sixí seayinini. ⁸Kiraisi Jisaso seayarinípa nioni eni diŋí sixí niseayiri náni siŋwí oseaniminiri íkíniŋí sipí niarini. “Poró nepa nene siŋwí neaniminiri náni íkíniŋí sipí ría wiarini?” niseaimóniríná Gorixo nioni e yarinagi siŋwí naninŋí eŋagi náni rarinini. ⁹Seyíné náni Gorixomi rixinŋí niseauriyiríná ripi urarinárinini, “Wigí wíniyí náni diŋí sipí niwiro arirá inarigíápi sayá nimixa úríxinini. Úrapí néra mú aga xixeni níjía nimóniro ‘Gorixo áamá e érixiniri wimónarinŋípi, ayí apíríani?’ yaiwiro diŋí niyaikiroro ‘Sipí imóninŋípi, ayí apíríani? Naní imóninŋípi, ayí apíríani?’ yaiwiro neróná diŋí sipí niniro arirá inarigíápi sayá nimixa úríxinini.” Gorixomi seyíné náni rixinŋí niseauriyiríná apini urarinárinini. ¹⁰Ayí ripi náni api seauriyarinárinini. Seyíné agwi ríná dání síá Kiraiso weapiníyáyi náni mimóní yarigíáyí yapi mimónipa ero xwiýíá seaxekwímopaxí mimónipa ero epíría náni diŋí niyaikiroro “Siwí wé róninŋí imóninŋípi, ayí apíríani?” oyaiwípoyniri rixinŋí seauriyarinárinini. ¹¹Api seyíné neríná Jisasi Kiraiso seaimixarinŋípimi dání íkíá sogwí naní niweríná yarinípa seyíné siwí wé róninŋí imóninŋípi ayá wí érixiniri rixinŋí e seauriyarinárinini. Áamá wí seyíné e yarinagía siŋwí niseaniróná “Wé róninŋí ayí yarigíápi mkí ikiŋo, ayí Gorixoríani?” niyaiwiro omi yayí umero seáyi e umíeyoaro epíría náni rixinŋí e seauriyarinárinini.

**“Nioni gwí ŋweaŋagi náni xwiýíá Jisaso nánipi
yaní niwéa warini.” urinŋí nánirini.**

¹²Gí nirixímeáyíné, seyíné ripi náni “Nijíá oimónípoysi.” nimónarinini. Amipí sipí nioni nímeáí ripi xwiýíá yayí neainarinŋípimi píri rakínipaxí mimóní nioni nímeáípimi dání ámi bi tñni yaní niwéa uni. ¹³Ayí ripi seararinini, “Mixí ináyoyá siminŋí wínarigíá aŋí riwámi awí rogiáyí tñni wí re ŋweagíá nñni eni ‘Poró Kiraisomi xídarinagagi náni gwí ría ŋweani?’ níriro níjía e imóninŋoi.” seararinini. ¹⁴Ayí ripi eni seararinini, “Negí nirixímeá aŋí ripimi ŋweagíáyí nápi nioni gwí ŋweaŋáná Gorixo arirá niarinagi siŋwí ninaniro náni omi ámi bi tñni diŋí niwikwíro wáyí miwiní eŋí sixí nñniro Gorixoyá xwiýíá náni anani wáí rarinŋoi.” seararinini. ¹⁵Ayí neparini. Wíniyí Poroni sipí diŋí niaiwiro xwiýíá rirowiági ero yarigíáyí eŋagi náni Kiraiso náni wáí rarinagía aiwi wíniyí nepa nioni náni diŋí naní niniawiro wáí rarinŋoi. ¹⁶Diŋí naní e niniawiro yarigíáyí, ayí nioni náni diŋí sixí niniyiro náni re yaiwiarigíárinini, “Xwiýíá yayí neainarinŋípi xídarinagwi náni xwiýíá neameáraniro yarigíápi píri urakíwiniginiri Gorixo rípeaŋo, ayí Pororíani?” E niyaiwiro wáí urarinárinini. ¹⁷E nerinŋí aiwi sipí diŋí niaiwiarigíáyí, ayí nepa “Wé róninŋí oyaneyi.” niyaiwiro mé nioni gwí ŋweaŋáná xwiýíá ámi bi tñni umeáraneyiniri yarinŋoi. “Poromi nimúrorane seáyi e owimónaneyi.” niyaiwiriŋípimi dání wáí urarinárinini. ¹⁸Apiaú xixegíni e yarigíápi náni

píoi rimíni? Wíniyí nepa mimónipa nemáná mañípáni wáf urariñagía niwiniñínáraní, wíniyí nepa nimónimáná wáf urariñagía niwiniñínáraní, nipiáúni Kiraiso nání niriro wáf rariñagía nání nioni yayí yariñini.

“Nioni sini mipé niñwearíná Kiraisomi seáyi e umepíría imóniñipi éimigini.” urinjí nánirini.

Oyi, nepa yayí emíni. Ayí ripi nánirini. ¹⁹Nioni re niriri ipimóniñini, “Rixiñí seyíne nioni nání Gorixomi nuriyiro kwíyí Jisasi Kiraiso neawirénapiyiñipi arirá niri yariñípimi dání gwí nioni ñweañáná ripi rixa niniwáripíríáraní.” niriri ipimóniñini. ²⁰Nioni ñiñí nikwímori “Nepa e éimigini.” yaiwariñápi nání ámá wí aí ayá nimopíría menini. Ámá siñwí ninaniñóná “Kiraiso nixídiri nání seáyi e imóniñí api ría yarini?” niniaiwiro omi yayí umepíría nání nioni wáf nirimeríná ínná ayá igigí mé eñí sixí neámixiniri yariñápa agwi eni sini axípi e éimigini. “Xe siñí ouniri niniwárirónáraní, ninipikíronáraní, Kiraisomi yayí umepaxí imóniñípini éimigini.” nimónarini. ²¹Nioniyá ñiñí ayí ripirini. Sini xwíá tíyo niñwearíná Kiraisomi yayí umepaxí imóniñipi emíáraní. E neri aí rixa niñperíná xwíá tíyo niñwearíná nímeáñipimi seáyi e imóniñipi nímeaníáraní. ²²Nioni sini mipé niñwearínáyí xwiyíá yayí neainariñipi wáf nurimeríná íkíá sogwí wearíñiyí yapi wepaxí aiwi gímíni gipi éimiginiri imónimíáraní? Sini ñweáimiginiri imónimíáraní? Rixa péimiginiri imónimíáraní? Nioni majíáraní. ²³Nipiáúni anani imónimiginiri nání rixa ayagwí imixáraníñini. Nioni niñpémáná nuri Kiraiso tíni niñwearíná ñiñí nioniyá “Ayí awiaxíriní.” niyaiwiri aiwi “Nioni e nerínáyí, sini seyíne arirá seaipaxímani.” yaiwariñini. ²⁴Ayináni nioni seyíne arirá seaimía nání mipé xwíá tíyo ñweámía nání “Ayí añipaxíriní.” nimónarini. ²⁵Nioni api nání “Neparini.” niyaiwiri ninipimóniri nání seyíne Gorixomi ñiñí niwikwíroríná none searéwapiyiñwápi xaíwí íá nixira uro ñiñí níá seainiri enía nání re niyaiwiri niñíá imóniñini, “Nioni agwi ríná mipé sini niñweari seyíne arirá seaimi nání emíáraní.” niyaiwiri niñíá imóniñini. ²⁶Nioni ámi seyíne tíámíni bimíáñipimi dání seyíne Kiraisi Jisaso tíni ikáriníñagía nání yayí seáyimi dání epíría nání “Nioni sini mipé niñwearíná ámi bi arirá seaimía nání imóniñini.” nimónarini.

“Axíyíniñí nimóniro xwiyíápi xaíwí íá xirírixini.” urinjí nánirini.

²⁷Pí pí ninimónirínáyí, úrapí mé ámá xwiyíá Kiraiso nání yayí neainariñipi ñiñí wikwíroarigíáyí epaxíñini xidírixini. Nioni ámi niñiri siñwí niseanirínáraní, ámi miñí seyíne yarigíápi nání sa aríáni niwiniñínáraní, re rariñagía aríá wimía nání, “Axíyíniñí nimóniro xwiyíá yayí neainariñipi xaíwí íá xirariñoi.” rariñagía aríá wiri “Ámá api píripírí yaniro yarigíáyo wákwianiro nání pírániñí nikumixiniro ñiñí

ná bini íá nixiriro yariŋoi.” rariŋagía aría wiri emía náni “Píraniŋí diŋí wikwíroarigiáyí epaxípini xídírrixini.” searariŋini. ²⁸ “Ámá píri urakianiri yarigiáyo Piripai ŋweáyí wáyí miwí yariŋoi.” rariŋagía aría wímigini. Ayí seyíne wáyí miyariŋagía siŋwí niseanirónáyí, “Nene anínaníwá náni imóniŋwaéne eŋagi náni ría neaíwapiyariŋoi?” yaiwinipíri náni seyíne siwániŋí winariŋoi. E neróná sewaniŋíyíne eni “Gorixo yeáyí neayimixemeaníapimi dáni ayo múroaníwáríani?” yaiwinipíri náni siwániŋí inariŋoi. ²⁹ Gorixo Kiraisomi diŋí owikwírópoyiniri siŋwí seaníŋímani. Omi nuxídiríná ríniŋí bi eni wímeáwiniginiri siŋwí seaníŋí eŋagi náni ámá wí píri searakianiro yaríná xwiyíá yayí neainariŋípi xaiwí íá xiríŋírixini. ³⁰ Eŋíná nioni seyíne tíŋímini wáf emearíná ámá wí nipikwini minikáripa yaríná siŋwí nanigiápi tñi agwi ríná eni “Poromi ámi sipí wikáariŋoi.” rariŋagía seyíne aría e wiarigiápi tñi axípi seyíne eni seaímeariŋagi náni searariŋini.

“Diŋí axípini íá nixiriri érixini.” uriŋí nánirini.

2 ¹ Kiraiso seaíŋíŋipimi dáni diŋí wía bi miseaónipaxírani? O wá seawianíŋíŋipimi dáni miŋí ikiŋwí miseamiripaxírani? Seyíne kwíyí Gorixoyápi tñi mikumixinípa reŋoi? Segí imónigiáyí tñi diŋí sipí iniro wá wianeniro minipaxírani? ² Api níŋini nepa imóniŋagi náni “Poró diŋí nífá onimiápi miwiní ayá wí owinini.” niseaimóniríná ripi érixini. Diŋí ná bini axípini íá nixiriri érixini. Diŋí sipí inarigiá axípini íá nixira úrixini. Axíyíniŋí imóníŋírixini. Api oyaneyiniróná diŋí ná bini tñini nimoro riníŋírixini. ³ Seyíne sipí nimónimáná mepa ero wárixayíne nimónimáná mepa ero érixini. Woxini woxini re yaiwiníŋírixini, “Nioni siyikwípiniŋí imóniŋáná gí wí seáyi e rinimóniŋoi?” yaiwiníŋírixini. ⁴ Seyíne re miyaiwí, “Nioni gí diŋí e nimónariŋíŋipini nixídiranéná ayí apánirini.” miyaiwí ámá wí wimónariŋíŋipi eni “Anani oyaneyi.” yaiwíŋírixini.

“Kirisoi siyikwípiniŋí nimóniŋíŋipimi dáni Gorixomi seáyi e umíeyoaníŋirini.” uriŋí nánirini.

⁵ Seyíne Kiraisi Jisaso yapi pákíní nimóniro o xwíá tíyo náni nibiríná diŋí moŋípa seyíne eni axípi móíŋírixini. ⁶ O Gorixo imóniŋípa aga nepa nimóniri aiwí wí re miyaiwiŋiniginí, “Gorixo tñi xixeni imóniŋápi wí miwáramopaxí imóniŋini.” miyaiwí neri ⁷ e imóniŋíŋipi pñi niwiárimi aga ámá wóniŋí nimóniríná omiŋí wiiníá náni Gorixoyá xinái wíniŋí imóniŋiniginí. ⁸ Ámá imóniŋípa nimónimáná xewaniŋo siyikwípiniŋí nimóniri Gorixo uríŋipi aría niwiri xixeni xídiŋiniginí. Ayí nipeńa nánini mariáí, yoxáíŋipami yekwiroáraná penía náni aí Gorixo uríŋipi aría niwiri xixeni xídiŋiniginí. ⁹ Jisaso e éí eŋagi náni Gorixo seáyi e numíeyoari yofí wíyo niyoni seáyi e múróniŋíŋipi wíriŋiniginí. ¹⁰ Ayí ripi náni e eŋiniginí.

Aŋínami ŋweáyírani, xwíáyo ŋweáyírani, xwíárími ínimi ŋweáyírani, níní yoí Jisasoyá aríá niwiróná xómíŋí niyikwiro yayí umero ¹¹ woákkí niwiróná “Niyoni nání Ámináo, ayí Jisasi Kiraisorini.” riro epíría nání Gorixo omi numéyoari yoí seáyi e imóniŋípi wíriniŋini. Kiraisomi áamá seáyi e umefírírini.

**“E éfrixiniri yeáyí seayimixemeaŋíyíné
xixeni api éfrixini.” uriŋí nánirini.**

¹² Gí diŋí sixí seayináyíné, Jisaso “Gí diŋí tñi bi oemini.” miyaiwí Gorixo uríŋí aríá niwiri xixeni nixídiríná siŋwepigí neaŋí eŋagi nání seyíné xámi Gorixo riŋíŋí aríá yímigí niwiro xixeni yagiápa nioni seyíné tñi ŋweaŋánáni maríái, agwi ríná nioni tñi miŋweá segíŋí niŋwearíná aí axíŋí e aríá yímigí niwiro pírániŋí xidíŋíŋini. Xixeni pírániŋí nixídiróná omi wáyí wiro óí wiro nero naŋí e éfrixiniri yeáyí seayimixemeaŋíyíné xixeni axíŋí éfrixini. ¹³ Xífo wimónariŋíŋí “E oyaneyi.” seaimóniro xixeni e ero epíri nání sfkíkí seamixariŋo, ayí xfo eŋagi nání rariŋini.

“Seaiméáŋí nání aniŋúmí ikaxí mirí yayíni éfrixini.” uriŋí nánirini.

¹⁴ Pí pí seyíné yarigíáŋí neríná aniŋúmí ikaxí mirípa ero xwiýíá ximiximí niniri mirípa ero éfrixini. ¹⁵⁻¹⁶ Segí yarigíáŋíŋí dání áamá wí xwiýíá seaxekwímopaxí mimónipa ero siyikwí mínigíáŋíné imóniro oépoyniri “Aniŋúmí ikaxí mirípa ero xwiýíá ximiximí niniri mirípa ero éfrixini.” searariŋini. Niaŋwí Gorixoyániŋí imónigíáŋíné sini xwíá tíyo niŋwearóná áamá xarixarí ero uyíniŋí ero yarigíáŋí tñi niŋwearo aí xwiýíá miseaxekwímopaxíyíné oimónípoyniri e searariŋini. Seyíné áamá sipí ayí tñi niŋwearo xwiýíá diŋí niyimiŋí imóniŋíŋí meapíría nání riniŋíŋí nuriróná wíániŋí wómixariŋoi. Seyíné aniŋí e néra nurónáyí, síá Kiraiso weapiníáŋí nioni diŋí re seaiawimíárini, “Nioni niyunimáná aniŋí miní wíwapiyiniŋí surímá mimóní rixa xixeni rí ripimónigoí?” niseaiawiri mixí seameakínimíárini. ¹⁷ Seyíné Gorixomi diŋí niwíkwíro xídarigíáŋí, ayí naŋwí o nání ridiyowá yarigíáŋíŋí imónini. Nioni seyíné omi pírániŋí oxídípoyniri niyunimáná seaíwapiyaríná áamá wí nipíkíáná ragí nioniyá púŋí, ayí iniŋí wainí ridiyowá seyíné yarigíáŋí ríá ápiáwí xwé oweniri seáyi e iwayimóáŋíŋí imóniniŋí. Nioni ninipíkíáná aí seyíné Gorixomi pírániŋí oxídípoyniri rixa seaíwapiyiniŋíŋí nipíkíá eŋagi nání anani nioni niŋí nímeáŋí nání yayí eri seyíné nání yayí eri emíárini. ¹⁸ Seyíné eni axíŋí nioni yayí yariŋápa segí seaimeáŋí nání yayí ero nioni nímeáŋí nání yayí ero éfrixini.

Timotio nání uriŋí nánirini.

¹⁹ “Áminá Jisaso ‘Ananirini.’ niwimónirínáyí, nioni síá áríní wí nipwémáná eŋáná Timotio seyíné tíŋí e yaxwí nénapíri seyíné imónigíáŋí

náni áwanj níraná dijí wía nóninía náni uowárfimigini.” nimónarini. ²⁰Ámá nioni tñi re ñweagíáyí wo seyiné náni dijí nimoríná Timotio moariñpa mimoariñj eñagi náni “Omí uowárfimigini.” searariñjini. O nepa seyiné náni “Arige ría imóniñoi?” ñiyaiwiri mimáyo tiniñorini. Ámá re ñweagíáyí wí axípi mimóniñoi. ²¹Ayí Kiraisi Jisaso api náni dijí omópoyiniri wimónariñjpi náni dijí mamó wigí wimónariñjpi nánini moarigíá eñagi náni omí seyiné tñj e náni uowárfimigini. ²²O mimiwiáró Kiraisomí pírániñj xídaríño eñagi náni seyiné ñijfáriní. Xámi nioni xwiýíápi wái urimearíná niaíwí xanomi sañj urápariñjpa neri sañj nírápiñorini. ²³Ayináni “Amipí nioni nipíríápi náni rixa aníñjini ñijfá nimónárímaná uowárfimigini.” nimónarini. ²⁴E neri aí nioni dijí re ñiyaiwiri ipimóniñjini, “Timotioni marfái, ñiwaníñoni eni Ámináoýá dijíyo dáni sini mé seyiné tíámíni bimíáriní.” ñiyaiwiri ipimóniñjini.

Epaírodaitaso náni uriñj nánirini.

²⁵E neri aí nioni dijí re yaiwiárfini, “Epaírodaitaso —O gí nírixímeáóniñj imóniñj worini. Jisaso náni wái urariñwápi náni gwí móniñwáyí worini. Xwirixí ñimearigíá ripi náni eni gwí nimóniñjyí worini. Seyiné nioni tñj e náni uowárenapáná sañj níronarónjyí worini. ‘O nioni tñi re sini ámi bi tñi oñweani.’ ñiyaiwiríná nañjmani. Ámi seyiné tñj e náni ouowárenapimíni.” yaiwiárfini. ²⁶O seyiné náni íkíniñj sipí wiri seyiné xwiýíá “O Romíyo níremómáná simixí weni.” rinarigíápi aríá wííá eñagi náni dijí ríá uxeri yariñagi náni seyiné tñjímíni ouowárenapimíni. ²⁷Xámi o nepa simixí xwé neri rixa nipémíniri éí aiwi Gorixo wá wianífpimi dáni ámi nañj eñjini. Omíni wá miwianí nioni eni wá niwianíñjini. Ayí ripi náni searariñjini. Epaírodaitaso niperínáyí, Poro dijí sipí ayá wí winiginiri wá niwianiri nañj imixiñj eñagi náni “Nioni eni wá niwianíñjini.” searariñjini. ²⁸Ayináni seyiné omí siñwí niwiniróná dijí nífá seainiri nioni “Piripai ñweáyí sini Epaírodaitaso náni ‘Simixí xwé yarini.’ ría yaiwariñoi?” ñiyaiwiri ududí ninariñjpi eni píni wiárirí oniniri aga ayá wí “Seyiné tíámíni ouowárimíni.” nimónarini. ²⁹Ayináni o ámi seaímeááná “Negí Ámináo tñi ikáriníñwáyí woríani?” ñiyaiwiro yayí tñi numímíniro yayí umero ámá óniñj imónigíáyí náni “Seáyí e imónigíáyírfani?” yaiwiro éríxini. ³⁰O “Kraisó wimónariñjpi owiimíni.” ñiyaiwiri neríná rixa nipémíniri eñj eñagi náni searariñjini. O seyiné añwi e meñagi náni arirá minipaxí imóniñjpi xewaniño Poromí owimíniri niniríná yoí mayí nimóniri rixa nipémíniri eñj eñagi náni searariñjini.

Iyí simí síó wákwínarigíápi dijí wikwíroarigíáyí náni uriñj nánirini.

3 ¹Gí nírixímeáyíné, xwiýíá yoparí bi ripi osearimíni. “Ámináo tñi ikáriníñwaeñerfani?” ñiyaiwiniro dijí nífá seainíwinigini.

Xámi ríwamiñí neari seaiapowáriénapiñápi ámi axípi nearíná animimí miniariñagi eaariñini. Nioni e neríná amá wí yapí seaíwapiyipírixiniri siñwí ririmixí seaimí eñagi náni rariñini. ²Ámá síwí uyíní yariñíyí yapí imónigíáyí —Ayí sipí imóniñípi yariñíyíyirini. Diñí xerñwí re moarigíáyíyirini, “Iyí símí síó wákwinigíápimi dáni Gorixoyá siñwíyo dáni amá wé róniñí imónarigíárini.” Xerñwí e niyaiwiro síó rónigíáyíyirini. Amá ayí seyíné yapí seaíwapiyipírixiniri siñwí tñni érixini. ³Ayí ripi náni searariñini. Nene Gorixo kwíyí neaiapiñípimi dáni omi yayí umerane Kiraisi Jisaso neaiiñípi náni seáyí e umerane yariñwaénerini. Negí imóniñwápimirani, newaniñene yariñwápimirani, diñí niwikwírorane diñí re miyaiwariñwaénerini, “Apiaúmi dáni anani Gorixoyá siñwíyo dáni wé rónipaxí imóniñwini.” niyaiwirane diñí síñá neaeánariñímani. Síó wákwiníñwaénerani, miwákwiníñwaénerani, Gorixoyá siñwíyo dáni nepa síó wákwiníñí imónigíáyí, ayí nene Kiraisomi diñí niwikwíroriñípimi dáni e imóniñwini. ⁴Nioni gí imóniñápirani, niwaníñoni yagápirani, apiaú náni diñí nimoríná “Apániríani?” niyaiwiri diñí síñá neánipaxí aiwi apiaúmi dáni wé róniñí imónipaxí meñagi náni diñí wí e niyaiwiri diñí síñá neánariñímani.

“Xámi diñí síñá nineága wagípi paímimí wariñini.” uriñí nánirini.

Ámá wí “Newaniñene apáni imóniñwini.” niyaiwiro diñí síñá weánariñagi aí nioni añipaxí imóniñini. ⁵Ayí ripi náni searariñini. Síá inókí nixiriñe dáni síá wé wíumi dñí waú wo óráná iyí símí síó niwákwigíonirini. Isireriyí wonirini. Siyikí Bejimanoyápimi dññonirini. Gí nieáriawé Xibiruyí wonirini. Ñwí ikaxí eániñípimi nioni Parisi imóniñá woni eñagi náni xixeni xídaríñá wonirini. ⁶Gí nieáriawé érowiápínigíápi xixeni oxídiminiri éáyí símí nixeadípeniri neríná Jisasoyá siyikí imónigíáyó xeaniñí wikárimeagáonirini. Amá ñwí ikaxí eániñípimi nixídiríñípimi dáni wé róniñí yariñíyíyirini nioni eni e xixeni yariñá eñagi náni amá ayairirí wí nipaxí mimóniñáonirini. ⁷E neri aiwi Kiraisomini aniñí diñí wikwírómfá náni xámi pí pí diñí síñá nineága wagípi agwi ríná rixa paímimí wariñárini.

“Wé róniñí Kiraiso neaiiñípimi dáni imónipaxípi ni oimónimini.” uriñí nánirini.

⁸⁻⁹Apini maríái, gí Áminá Kiraisi Jisaso náni niñíá xixeni nimóniríná imóniñápi, ayí nioni Judayí wo nimóniriñípimi dáni imónagápirani, niwaníñoni yagápirani, nimúróniri seáyí e imóniñagi náni “Xámi yagápi rixa sipí imónini.” yaiwiñini. Ai, o niñípi náni diñí nimoríná “Xámi diñí síñá neánagípi, ayí sikípiániñí imóniñípiríani?” yaiwiñini. Aniñí Kiraiso tñni kumixinirai o tñni nawíni ikáriniri emía náni e yaiwiñini. “Wé róniñí xewaniñoni ñwí ikaxí eániñípi xídaríñápi dáni imónipaxí

enji pi oimónimini.” minimóni wé róniñi Kiraisomi diñi wikwíróána imónipaxi enji pi —Api Gorixo áma xewaxomi diñi wikwíroariñagi niwiniñi “Wé róniñiñi.” rárariñipirini. “Apini oimónimini.” nimónariñagi nani “Xami diñi sija neañagi, ayi sikipiániñi rimónini?” yaiwiñini. ¹⁰Enji eániñi Kiraiso niperi ámi wiápinimeañipi nioni eni axipi nímeari ríniñi o meañipi axipi meari diñi o niyaiwiri penji pi axipi yaiwiri emía nani o tni erimeániñwíloni imónimiginiri “Siyikwípiániñi imóniñiñi ría imónaganigini?” yaiwiñini. ¹¹Pegíáyí niwiápinimeariñi nani diñi niyimiñi tijañoni imónimía nani re nimónarini, “Kiraiso tni erimeániñwíloni imónimiginini.” nimónarini.

**“Áma yamiyamúrónigi niniróna yariñiñi
yariñiñi.” uriñi naniñi.**

¹²“Nioni Gorixo diñi ‘Poro e imóniwinigini.’ niaiwiñipi tni rixa xixeni imóniñini.” misearariñini. “Rixa yoi imóniñini.” misearariñini. E misearipi neri ai Kiraisi Jisaso Poro e imóniwiniginiri ía niyamixiñipi tni xixeni imónimiginiri sími nixeadípeniri nera wariniñi.

¹³Nirixímeáyíne, “Nioni api tni rixa xixeni imóniñini.” miyaiwi ripini ía nixiriri yariñini. Xami imónagapi nani aría nikeamori sini mimónipa enji pi nani diñi nimori yariñini. ¹⁴E nerína áma yamiyamúrónigi niniróna ipimoáriñipi omeaneyiniro íkía orañiñiñe nani iríniñi warigíapa nioni eni Gorixo nene nani ipimoáriñipi —Api Kiraisi Jisaso neaiiñipimi dani diñi niyimiñi añinami dani imónaníwa nani Gorixo wái nearepeáriñipirini. Api meáimiginiri axipi éniñi neri iríniñi wariniñi.

¹⁵Diñi yoi imóniñwaéne diñi xegí bi mimó nioni searariñipini mówanigini. Seyíne diñi nioni nimori searariñipi maríai, diñi xegí bi ía nixirirónáyí, Gorixo api nani eni wía seaókímixiniñarini. ¹⁶E neri ai diñi nañi nene rixa nimorane xiriñwápi xaiwi wakirímixiwanigini.

“Nioni ikaniñi niaxidípoi.” uriñi naniñi.

¹⁷Nirixímeáyíne, siñwepigi nioni enjipimi niaxidípoi. Siñwepigi none yariñwápa yariñiñi eni siñwi mí omixaxidípoi. ¹⁸Ayi ripi nani searariñini. Áma obaxi wigí diñiño nixidírona yariñiñipi dani réniñi niñi siwá neainariñoi, “Xwiñi Kiraiso yoxáipami yekwíroarána neaiiñipi nani riniñipi nani mineaimóni o tni xepixepá róniñwini.” Éniñi niñi siwá neainariñoi. Áma e yariñiñi nani rixa ámi ámi searayiñigini. Agwi eni siñwirixi tni searariñini. ¹⁹Ayi ripi naniñi. Áma ayo Gorixo aníniñiñarini. Wigí agwi wariñipi naniñi miñi inarigíapi, ayi ñwiániñi xirarigíáyirini. Wigí yariñiñipi ayi wimopaxi imóniñagi aiwi weyi menarigíarini. Amipi xwía tño wenji pi naniñi sími sími e nitiniño yariñiñi. ²⁰Áma ayi e yariñiñi ai ayi ripi nani “Siñwepigi nioni enjipimi ikaniñi niaxidípoi.” searariñini. Nene

aŋínami ŋweaníwaénerini. Áminá Jisasi Kiraiso e dání niweapiri yeáyí neayimixemeáwiniginiri weniŋí neri ŋweaŋwaénerini. ²¹ O niweapiri negí wará urí epaxí imóniŋí tiyí xíoyániŋí oimónípoyiniri neaimixáná awiaxí oyá imóniŋípa axípi e imónaníwárini. Ayí xegí eŋí eániŋí amipí níní ínimi onurínípoyiniri wimixipaxí imóniŋípi tñí negí warápi oyániŋí neaimixiyiná eŋagi náni searariŋini.

4 ¹ Ayináni diŋí sixí seayiŋáyiné, siŋwí seaniminiri náni íkíniŋí sipí niariŋíyiné, Jisasomi pírániŋí nixídiríŋípimi dání diŋí nífá nimixiro Gorixo e éwiniginiri níŋípeáaná mimíwiáró eŋápi náni siwániŋí niniro yarigiáyínerini. Seyíne iriwá mé “Ámináo tñí ikáriníŋwaéneríani?” niyaiwiniro xaíwí diŋí sixí níniro ŋweáfrixini.

Apixí wípaúmi uriŋí nánirini.

² Yuodiaxí tñí Sidikíxi tñí eŋí rirémixí bi oeaimini. Aípagwí Ámináo tñí ikárinigípagwí eŋagi náni nawíni nimóniri ŋweápiyi. ³ Ai, xwiyápi wáí uraníwí náni ríkwíniŋí nimóniri gwí nawíni mónígwífoxini, joxí apixí ípaú diŋí ná bini xiripisi náni wimiximiniri érixini. Nioni tñí xwiyá yayí neainariŋí imóniŋípi wáí urimeani náni gwí nimónigípaú eŋagi náni rariŋini. Ípaú Kiremedo tñí wía nioni tñí wáí urariŋwáowa tñí eni gwí nimóniri nawíni egípaú eŋagi náni rariŋini. Ayíyá yoí íkwí diŋí niyimiŋí imóniŋípi meapíríánami ŋwirárinini.

“Awayini érixini.” uriŋí nánirini.

⁴ Seyíne íníná “Ámináo tñí ikáriníŋwaéneríani?” niyaiwiniro yayí érixini. Ámi axípi dirírí bi oseaimini. E niyaiwiniro yayí érixini. ⁵ Ámá níní “Ayí sanigíáyíríani?” seaiwipírí náni awayini nipení nimóniro érixini. Ámináo weapíná náni rixa aŋwi e eŋagi náni searariŋini. ⁶ Wí ududí miseainipani. Pí pí seaímeáaná Gorixomi urírixini. Omi nuriríná rixiŋí “Anani e neaii.” uriro yayí wiro érixini. ⁷ E nerónáyí, seyíne Kiraisi Jisaso tñí nawíni ikárinigí eŋagi náni niwayiróniro kikiá ŋweapírí náni Gorixo anani e seaimixiníárinini. Niwayiróniro kikiá ŋweapírí náni Gorixo seaimixiníápi, api náni ámá xixeni níjía oimónaneyiniro aiwi wí “Ayí apíríani?” yaiwipaxí mimóniŋípirinini. Gorixo api tñí seaimixánáyí, wí diŋí sipí seaimixiri ududí seainiri epaxímani.

“Naŋí imóniŋípi nánini diŋí nimoro érixini.” uriŋí nánirini.

⁸ Nirixímeáyiné, yoparí bi ripí osearimini. Pí pí nepa imóniŋípi tñí pí pí seáyí e umepaxí imóniŋípi tñí pí pí wé róniŋí imóniŋípi tñí pí pí siyikwí míniŋí imóniŋípi tñí pí pí awiaxí imóniŋípi tñí pí pí weyí umearigíá imóniŋípi tñí —pí pí siwí yadimiŋí imóniŋípirani, pí pí siwí yayí umepaxí imóniŋípirani, api nipini náni diŋí pikínírixini. ⁹ Amipí nioni seaíwapiyáná seyíne “Neparini.” niyaiwiro umímíniŋíápi —Api

aríá niro siŋwí nanaxídiro egiápirini. Api néra úrixini. E néra nurónáyí, Gorixo —O xíoyá diŋí t́ni áamá niwayiróniro kikiá ŋweapíri náni wimixariŋorini. O xegí diŋí t́ni seakikayoníárinini.

“Seyíné nioni náni diŋí nimoarigiápi náni yayí ninarini.” uriŋí nánirini.

¹⁰ Emá ayá wí rixa niŋwémáná eŋáná seyíné ámi nioni náni diŋí nimoro amipí wí wiowárenapíagi náni “Ámináo t́ni nawíni ikárininiáoniríani?” niyaiwiri yayí ayá wí yariŋini. Xámi íná nioni náni diŋí ninimoro aiwi nioni aŋwi e meŋagi náni saŋí nirápipaxí mimóniŋagi náni nioni niŋjárini. ¹¹ Nioni amipí wí náni díwí nikeamóniri náni misearariŋini. Nioni rixa re niyaiwiri éwapíniŋárinini, “Pí pí nimónirínáyí, ayí anani xe oimónimini.” niyaiwiri éwapíniŋárinini. ¹² Nioni wireŋí meániáoni nimóniri niŋwearínáranini, sirí muní nimóniri niŋwearínáranini, “Ayí ananirini.” niyaiwiri kikiá ŋweámíá náni rixa néwapíniri niŋíá imóniŋini. Pí pí wí nímeáánáranini, agwí ímí niniyirínáranini, agwí ninirínáranini, “Ayí ananirini.” niyaiwiri kikiá emíá náni ínimi imóniŋípi náni rixa néwapíniri niŋíá imóniŋini. ¹³ Api, ayí ripirini. Kiraiso eŋí sixí neámixiŋípimi dáni pí pí nímeááná “Ananirini.” niyaiwiri kikiá ŋweapaxírinini. ¹⁴ E neríŋí aiwi xeaniŋí ripi nímeááná seyíné arirá owianeyiniri nigíápi weyí seamearipaxí nigíárinini. ¹⁵ Piripai ŋweáyíné, nionini maríái, sewaniŋíyíné eni ripi náni niŋjárini. Iwamíó nioni xwiyíá yayí neainariŋípi wáí niriríná Masedonia piropenisíyo píni niwiárimini uŋáíná Jisasoyá siyikí imónigíá aŋí bimi ŋweagiápi maríái, seyínéni nioni saŋí nirápaniro náni wiowárenapayigíawixini. ¹⁶ Nioni píni niseawiárimini nuri sini ná jíami mú aŋí Tesaronaikayo e ŋweaŋáná ná bini miwiowárenapigíawixini. Biaú wiowárenapigíárinini. ¹⁷ Ámi bi wiowárenapírixiniri misearariŋini. Seyíné nioni náni wiowárenapariŋagiá eŋagi náni Gorixo naŋí seaiúwiniginiri searariŋini. ¹⁸ Amipí níni seyíné wiowárenapípi nimearíná xixeni nimeari aí ámi surímá wí epákwínowíiniginini. Wiowárenapáná Epapírodaitaso nimeámi bípi rixa meáá eŋagi náni nioni rixa apánirini. Seyíné saŋí nirápaniro wiowárenapíápi, ayí Gorixo náni ridiyowá sinadiŋí naŋí eaariŋípiŋiŋí imónini. Api sinadiŋí weááná diŋí yayí winipaxíniŋí imóniŋípirini. ¹⁹ ŋwíá nioni xidariŋáo, o seyíné Kiraisi Jisaso t́ni nawíni ikárinigíáyíné eŋagi náni amipí seyíné díwí ikeamónigíápi niseaiapiríná “Amipí níni naŋípi náni mimúroniŋáoniríani?” niyaiwiri seáyi e imóniŋípi seaiapiníárinini. ²⁰ Negí ápo Gorixomi áamá níni aniŋí miní seáyi e umíeyoáwanigini. “Api e éwanigini.” nimónarinini.

Yayí wiowáriŋípi nánirini.

²¹ Nioni “Ámá Jisasi Kiraiso t́ni ikárinigíá niyoni yayí niwíúrixini.” nimónarinini. Nírixímeá nioni t́ni re ŋweagiáyí eni yayí seaiwáraníoi.

²² Ámá Gorixoyá re ηweagiá níni yayí niseaiwáriro aí ámá Gorixoyá mixí ináyí Sisaoyá aηíyo omiηí wiiarigiáyí aηipaxírini. ²³ Áminá Jisasi Kiraiso wá niseawianiri diηí seakikayówinigini.